

每週經課朗誦經文(巴克禮漢羅/教羅)2012/11/25

共同經課 - 1

撒母耳記下二十三章一節~七節

1 大衛結尾 ê 話，排列 tī 下底。耶西 ê kiáⁿ 大衛講，得 tiòh 升高 ê 人，是雅各 ê 上帝所抹油 ê，Tī 以色列 gâu 做歌 ê 講：2 耶和華 ê 神用我來講，伊 ê 話 tī 我 ê 舌。3 以色列 ê 上帝有講，以色列 ê 石磐對我講：用公義治理人，敬畏上帝來治理 ê，4 伊 beh 親像透早日 tú-á 出 ê 光，無雲 ê 清早，雨落過身 ê 光彩；Hō 地發幼幼 ê 草。5 我 ê 家 tī 上帝 ê 面前 m̄ 是 án-ni；Iáu-kú 伊有 kap 我立永遠 ê 約，無 m̄ 照次序排列 koh 堅固；雖然伊無 hō 伊生長，這就是我一切 ê 拯救，一切 ê 意願。6 總是匪類 lóng 親像刺 á beh 受割 sak，人 m̄ 敢用手 thèh 伊；7 Beh 摸伊 ê 人，tiòh 用鐵器 kap 鎗柄，Tī 伊 ê 所在 beh hō 火一盡燒去。

共同經課 - 2

詩篇一百三十二篇一節~十二節

1 上崎 á ê 詩。1) 耶和華 ah，大衛所受一切 ê 苦難，求你記念伊；2 伊怎樣對耶和華 chiù-choā，對雅各 ê 大權能 ê 下願；3 講，我的確無入我 ê 家 ê 布棚，也無上我 ê 眠床；4 我無容允我 ê 目矙暈去，也無容允我 ê 目矙皮合 oá；5 Thèng 候我為 tiòh 耶和華 chhē-tiòh 所在，為雅各 ê 大權能 ê chhē-tiòh khiā 起 ê 所在。6 看 ah，阮聽見約櫃 tī í-hoat-tha；阮 tī 樹林 ê 田 tú-tiòh 伊。7 阮 beh 入伊 khiā 起 ê 所在；阮 beh 拜 tī 伊 ê 腳踏椅前。8 耶和華 ah，求你起來；你 kap 你 ê 氣力 ê 約櫃相 kap 入你歇暈 ê 所在。9 願你 ê 祭司穿公義做衫；願你聖 ê 百姓出歡喜 ê 聲。10 求你因為你 ê 奴僕大衛 ê 緣故，莫得棄 sak 你 ê 受抹油 ê。11 耶和華用誠實對大衛 chiù-choā，的確無反覆，講，我 beh hō 你所生 ê 坐 tī 你 ê 寶座。12 你 ê kiáⁿ 若守我 ê 約，Kap 我所 beh 教示 in ê 法度，In ê kiáⁿ 孫 beh 永遠坐 tī 你 ê 寶座。

共同經課 - 3

啟示錄一章四 b 節~八節

4 願 lín 得 tiòh 恩典平安，tùi hit-ê 現在 tī-teh，早 tī-teh，將來亦 tī-teh ê，以及 tùi 伊座位前七個神；5 koh tùi 耶穌基督，就是忠信 ê 干證，死人中頭一個活 ê，地上 chiah-ê 王 ê 主宰。6 伊疼咱，用伊 ê 血 tháu 放咱脫離咱 ê 罪；hō 咱做國，做伊 ê 父上帝 ê 祭司；願榮光權能歸 tī 伊，到代代。À-bēng。7 伊坐雲來，眾目矙 beh 看見伊；連鑿伊 ê 人亦 beh 看見伊；地上 ê 族，lóng beh 為 tiòh 伊來啼哭。實在是 án-ni。À-bēng。8 主上帝講，我是 A-lí-hoat，koh 是 O-bí-ka，現在 tī-teh，早 tī-teh，將來 tī-teh ê，是全能 ê。

共同經課 - 4

約翰福音十八章三十三節~三十七節

33 彼拉多 koh 入公堂，tiàu 耶穌來，kā 伊講，你是猶太人 ê 王 mah？34 耶穌應講，你講 chit-ê 話是對你家己，á 是別人將我 ê 事 kā 你講 ah？35 彼拉多應講，我 kiám 是猶太人 mah？你本國 ê 人 kap chiah-ê 祭司頭將你交 hō 我；你果然怎樣做 ah？36 耶穌應講，我 ê 國 m̄ 是屬 chit 世間；我 ê 國若屬 chit 世間，就我 ê 差用的確爭戰，免得我交 hō 猶太人；但是 taⁿ 我 ê 國 m̄ 是 tùi chia 出。37 彼拉多就 kā 伊講，Án-ni，你是王 mah？耶穌應講，你講我是王。我為 tiòh án-ni 出世，為 tiòh án-ni 臨到世間，beh 替真理做干證。凡若屬真理 ê 人，聽我 ê 聲。